

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهُ إِلَّا اللَّهُ مُحَمَّدٌ رَّسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

06 Septembre 2019

06 Muharram 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : **MUHARRAM**

إِنَّ عِدَّةَ الشُّهُورِ عِنْدَ اللَّهِ اثْنَا عَشَرَ شَهْرًا فِي كِتَابِ اللَّهِ يَوْمَ خَلَقَ السَّمَوَاتِ وَالْأَرْضَ مِنْهَا أَرْبَعَةٌ
حُرْمٌ ذَلِكَ الدِّينُ الْقَيِّمُ فَلَا تَظْلِمُوا فِيهِنَّ أَنْفُسَكُمْ

'Inna iddatash-shu-shuuru 'indal-laahisnaa 'a-shara ran-fii Kitaabil-laahi yawma khalaqassamaawaaati wal-'arda minhaaa 'arab-'atun hurum: zaalikad-Diinul-Qay-yim. Falaa tazlimuu fiihinna 'anfusakum.

« Pou Allah, le nombre de mois dans ene l'année ki Li fine prescrire le jour ki Li fine créer bane les ciels et la terre, c'est douze mois, parmi lesquels quatre sacrés (c'est-à-dire, Dhul-Qaddah, Dhul-Hijjah, Muharram et Rajab): C'est sa la religion droite. (Durant sa bane mois là), pas faire du tort entre ou-mêmes. » (At-Tauba 9 : 36).

Le mois de Muharram li ene de bane quatre mois sacrés d'Allah (swt). Sa bane mois sacrés là c'est : *Rajab*, *Dhul-Qaddah*, *Dhul-Hijjah*, et *Muharram*. L'obéissance dans sa bane mois là rapporte plisse récompense et désobéissance ki commette dans sa bane mois là li multiplier punition [lor bane ki montrer zot désobéissant].

C'est le seul mois de l'année ki le Prophète (saws) fine connecter au nom d'Allah (swt). Li fine appelle li « **Le Mois Sacré d'Allah** » (*Shahrullah al-Muharram*). L'émigration (*Hijrat*) du Saint Prophète (saws) de Makkah à Madina pas fine ena lieu dans sa mois là couma dimounes ena tendance pou croire. Mais *Hijrat* fine passer dans mois de Rabi-ul-Awwal. Sa pratique pou prend le 10^{ème} jour de Muharram comme ene deuil [avec tous so bane cérémonies non-islamiques] à cause de la mort de Imam Hussein ibn Ali (ra), li pas forme ditout partie de *Sunnah* de nous bien-aimé prophète (saws). Le Saint Prophète (saws) zamais fine ordonne à so bane compagnons ni à so *Ummah* (communauté) pou prend malheurs de bane prophètes et zot la mort couma bane cérémonies de deuil. Et si pour bane prophètes li pas fine ordonne sa, alor ki pour dire de bane ki pas ti bane prophètes ?

Donc, li pas permette pou prend le 10^{ème} jour de Muharram comme ene jour kot bizin chagrin et triste et pour nous rassembler dans sa but là. Non ! C'est vrai ki li bien chagrinant et triste saki fine arrive ti zenfant de nous bien-aimé prophète (saws) et garçon de Hazrat Ali (ra), le 4^{ème} Calife Bien-Guidé (*Khalifa-e-Rashideen*). Mais faudé pas faire bane cérémonies de deuil. Nous capave pendant sa jour là explique à bane jeunes ki pas au courant de sa tragédie là et dire zot à propos de bane sacrifices et martyre de Hazrat Imam Hussein ibn Ali (ra), de so famille et de so bane compagnons. Ena dans sa ene leçon pour tous bane musulmans jusqu'à le jour du Jugement Dernier, et li ti pou ene bon zaffaire pou explique à bane jeunes à propos de sa partie de nous l'histoire en tant ki musulmans afin ki nous tous vine braves, pieux, honnêtes, sincères et bien courageux couma Imam Hussein ibn Ali (ra).

Le point important couma mo fine dire zot c'est ki nous bien-aimé prophète Muhammad (saws) zamais fine ordonne à so bane compagnons ni à so communauté pou prend malheurs de bane prophètes et zot la mort couma bane cérémonies de deuil. Si pour bane prophètes ki fine mort, nous bien-aimé prophète (saws) pas fine donne l'instruction pour pratique bane cérémonies de deuil, alor comment ce fait-il ki aujourd'hui bane musulmans fine piétine sa l'instruction (ou sa l'enseignement) là et zot fine introduire plusieurs bane innovations (*bidat*) dans la religion pure de l'Islam ? Azordi jours nous trouver ki kan ene dimoune proche mort, ene partie de bane musulmans pratique *Khattam* ou *Chalisma*. Et en plusse de sa, zot prépare bane manger couma *brianni* et zot

invite bane Mullahs et bane les autres dimounes pou vine lire tous les jours pendant quarante jours.

Sa c'est bane innovations (*bidat*) ki pas ti exister dans l'islam. Pas ti ena *Urs* pour bane *Pîrs*, couma bane cérémonies de deuil et la construction de bane *Dargas* en zot mémoire. Aujourd'hui sa bane innovations là fine prend ene l'ampleur inquiétant parski sa bane actes là zot en d'autres mots veut dire ki bane ki pé pratique sa parmi bane musulmans, zot pé commette le *Shirk*. Zot pé associer bane les autres dimounes avec Allah.

Certains musulmans pé pratique l'idolâtrie dans ene forme différent, en adressant zot *duahs* à bane dimounes ki fine morts et ki zot croire ki sa bane là pou capave intercéder en zot faveur auprès d'Allah. Li pas étonnant non plus, ki kan bane dimounes de bane les autres religions, spécialement bane hindous trouve sa bane pratiques là, zot approuve sa et zot aussi zot alle lor sa bane *Dargas* là parski sa c'est bel et bien zot propres pratiques et cultures ki bane hindous dans le passé, kan zot fine accepter l'islam fine introduire dans la religion pure de l'islam. Au lieu ki zot accepter bane préceptes de l'islam couma bizin, zot fine introduire zot propres croyances et zot fine mélange sa avec bane croyances de l'islam pour créer ene l'autre perception de bane pratiques de l'islam et tout sa li bien condamnable dans l'islam. Allah, à travers So Livre (le Quran) et So Messager (Hazrat Muhammad (saws)) fine condamne tous sa bane pratiques là.

Lontan, bane païens [de l'Arabie] ti pé adore bane idoles, et ensuite zot fine gagne la foi dans ene Dieu Unique. Hazrat Muhammad (saws) et so bane compagnons avec l'aide d'Allah fine conne montré zot le droit chemin. Mais ki fine arriver après la mort du Saint Prophète Muhammad (saws) ? Bane musulmans fine divisé, et fine ena même ene dimoune bien détestable couma Yazeed ki fine démembrer le corps sain de l'islam, et Hazrat Imam Hussein (ra) ti représente sa lé corps béni là! Alor, tout sa li matière à réflexion ! Bane musulmans ena le devoir pou réfléchi lor tout sa avant ki zot quitte sa le monde là. Couma eski zot pou capave fer face Allah kan zot fine pratique sa genre de *Shirk* là en croyant ki zot ti pé bien faire ?

ROZA JOUR ASHURA

D'après ene Hadith rapporté par Abdur Rahman ibn As-Sakhr (ra), le Saint Prophète (saws) fine dire : « *Meilleur carême (Roza) après Roza de Ramadan c'est celui du mois sacré d'Allah, Al-Muharram.* » (Muslim).

Nous comprend par sa ki li fortement recommandé pou garde Roza pendant le mois de Muharram. Et couma zot conner, Roza li pour Allah et non pas pour ene l'autre. Le Saint Prophète Muhammad (saws) avant la révélation de commandement d'Allah pou observe Roza [pendant le mois de] Ramadan ti ena l'habitude pou garde Roza le jour d'Ashura, le 10^{ème} jour du mois de Muharram en remerciement à Allah pour la victoire ki Allah fine accorde à Hazrat Moussa (as) lor Pharaon, le grand tyran de l'histoire de l'humanité. Ki Allah (swt) maudit sa Pharaon là éternellement. *Ameen.*

Bane musulmans ena ene droit supérieur lor Hazrat Moussa (as) ki bane Juifs, parski bane musulmans – bane ki respecter complètement tous bane préceptes islamiques – zot bane vrais héritiers du prophète d'Allah, Hazrat Moussa (as).

Abdullah ibn Abbas (ra) rapporter : « *Kan le Messenger d'Allah (saws) fine arrive à Madina, li fine trouver ki bane Juifs ti pé garde Roza le jour d'Ashura. Li fine demande zot : 'Ki été sa carême là ?' Zot fine réponde : 'C'est ene bon jour, c'est jour kot Allah (swt) fine sauve bane zenfants Israël de zot bane l'ennemi. Moussa (as) fine par conséquent garde Roza sa jour-là.' Rassoollullah (saws) fine alor dire : 'Mo ena plisse droit ki zot lor Moussa.' Li fine donc garde Roza sa jour-là et li fine ordonne nous pou faire pareil.* » (Bukhari).

En résumé, kan Hazrat Moussa (as) fine quitte l'Égypte en compagnie de so bane disciples, Pharaon fine suive zot avec so l'armée, kot parmi ti ena bane notables (bane dimounes de la haute société – ki bien riches), bane conseillers, bane coptes, etc.

Les deux groupes fine bientôt ensuite vine proche ene de l'autre kot sakaine capave trouve so camarade. Au fur et à mesure ki Pharaon et so bane z'hommes fine rapproche zot avec bane disciples de Hazrat Moussa (as), alor ene la peur fine attrape sa bane là [bane disciples là] zot les cœurs, ki attention sa tyran alle réussi maille zot. Mais Hazrat Moussa (as) fine reconforte so peuple couma Allah

informe nous dans sa verset là: « **Pharaon et so l'armée fine suivre zot le matin. Et kan les deux groupes fine vine en vue ene de l'autre, bane camarades Moussa dire : 'Nous fine attraper.' Moussa dire : 'Jamais. Car mo Maître avec moi, et Li pou guide moi.' Alor Nous fine dire à Moussa par révélation : 'Frappe la mer avec to bâton.' Li fine alor fende, et sak côté fine vine couma ene grand montagne. Nous fine faire les autres aussi approche sa l'endroit là. Et Nous fine sappe Moussa et tout séki ti avec li. Ensuite, Nous fine noye les autres. Là-dans vraiment ena ene signe, mais la plupart parmi zot pas croire. Et c'est to Maître ki Tout-Puissant et Miséricordieux. » (Ash-Shu'ara 26 : 61-69).**

En constatant ki so la mort pas loin, Pharaon fine presser pou attester so la foi dans sa vrai Dieu ki li fine tous les temps renié là. Malheureusement, li ti trop tard pour li. Kan l'âme arrive à la gorge d'ene kikaine, li vine trop tard pou li pou repentir et pour ré-vine vers la vérité. Allah (swt) dire : « **Nous fine faire peuple Israël traverse la mer ; et Pharaon et so l'armée fine suivre zot pou faire zot du tort et attaque zot. Enfin kan li ti près pou noyer, li dire : 'Mo accepter ki pas ena ene l'autre bondié à part Celui ki peuple Israël accepter, et mo soumette'. [Allah dire]: 'Quoi (to accepter) maintenant? Mais avant sa to ti désobéir et to ti faire désordre.' Alor aujourd'hui, Nous pou sauve to lécorps, afin ki li servi comme exemple à dimounes ki pou vine après toi. Mais beaucoup dimounes pas prend Nous signes compte. » (Yunus 10 : 91-93).**

Ensuite la mer fine rejette li, afin ki li vine ene l'exemple éternel pour bane ki réfléchi, ki ena l'intelligence (bane *Ulul-al-Baab*). Sa c'est conséquence de bane péchés d'ene vrai dictateur, ki so l'arrogance péna limites. C'est sa séki arrive en dernier lieu à l'injustice et la tyrannie. Punition dans *Aakhérat* li encore pli pénible et pli durable pour li. Allah confirme sa fait là dans So Livre Béni (Quran Shareef) : « **Alor Allah fine protège li [Moïse] contre zot mauvais complot ; et ene mauvais punition ti entoure famille Pharaon : du feu, et zot pou exposer à sa, matin et soir ; et jour ki l'Heure là pou sonner (pou dire) : 'Faire famille Pharaon entre dans punition plus sévère ki ena.' » (Ghafir 40 : 46-47).**

Donc, pour célébrer sa victoire là, bane Juifs ti pé garde Roza sa jour-là. C'est ene noble action ki le Saint Prophète Muhammad (saws) ti approuver. Li pas fine seulement approuvé mais li fine mette li en pratique aussi.

Le Saint Prophète Muhammad (saws) ti ena aussi l'habitude pou garde Roza le 9^{ème} jour de Muharram. Ibn Abbas (ra) rapporter dans ene l'autre version (de sa Hadith là) ki Rassoollullah (saws) fine dire : « *Si mo vive ziska l'année prochaine, mo pou garde Roza aussi le neuvième (jour de Muharram).* » (Muslim).

Donc, li ti pé garde Roza le 9^{ème} et 10^{ème} jour de Muharram, et li fine recommande même pou garde Roza ene jour après le jour d'Ashura. Li fine dire : « *Garde Roza le jour d'Ashura, [et] alle contre bane Juifs [dans zot bane pratiques] en observant Roza ene jour avant ou ene jour après.* » (Ahmad).

Roza Ashura expier bane ti péchés ki ene dimoune fine commette durant l'année ki fine passer. (Muslim). Nous garde Roza sa jour-là pour remercier Allah (swt) et montrer nous reconnaissance envers Li (swt). Même bane Quraishs avant l'avènement de l'Islam ti pé garde Roza le jour d'Ashura. Et plus tard, après la révélation de sa commandement d'Allah pour garde Roza pendant le mois de Ramadan, alor sa jour Roza (Ashura) là fine vine optionnel.

D'après Hazrat Aisha (ra) : « *Ashura ti ene jour carême pour bane Quraishs à l'époque avant l'Islam. Le Saint Prophète (saws) ti pé observe également sa jour de jeûne là. Kan li fine émigrer Madina, li fine garde Roza le jour d'Ashura et li fine ordonne à so bane compagnons pou faire pareil. Par la suite, Kan Roza de Ramadan fine prescrire, li ti pé garde seulement bane Roza Ramadan et li fine délaisse celui d'Ashura. Donc, ene kikaine li libre pou garde Roza ou sois non sa jour-là.* » (Bukhari).

Alor Roza Ashura et bane les autres Roza de mois de Muharram dans so l'ensemble zot optionnels et faudé ki en aucaine cas, pas associer Ashura et garde Roza avec la mort de Imam Hussein (ra) ou bane les autres dimounes ki fine morts sa jour là. Nous bizin remercier Allah et demande Li pou protège nous continuellement contre le mal dans tous so bane formes.

Et s'il vous plaît mazine dans zot bane *duahs* madame de nous Naib Amir Hariz Sahib de Kerala, Razia Sahiba, ki bien malade, et prier également pour tous nous bane membres malades, bane missiés, madames et bane zenfants dans bane différents pays - Comores, Mayotte, etc. - et bane ki fine personnellement envoie moi bane emails pou prier pour zot.

Ki Allah (swt) faire nous miséricorde et favorise nous par ene victoire continuelle
lor So bane l'ennemis et bane l'ennemis de l'Islam. *Ameen, Summa Ameen, Ya
Rabbul Aalameen.*

Sur ce, mo souhaite à tous mo bane disciples et les autres musulmans du monde
entier : **Muharram Mubarak ! Naya Saal Mubarak !**